



KOMUNIKADO PA PRENSA

Fecha
1 di febrüari 2016

Kontakto
Kabinèt Minister VVRP

TA BAI KUMINSÁ TRAHA KAS NA WECHI DESPUES DI 23 AÑA DESPUES DI HOPI ESFUERSO DI MINISTER CAMELIA-RÖMER

Willemstad – Minister di Tráfiko, Transporte i Planifikashon Urbano (VVRP), sra. Suzy Camelia-Römer, den su afán pa konstruí mas kas pa biba na Kòrsou, a duna e proyekto di Wechi e prioridat nesesario pa por kuminsá konstruí e promé 62 kasnan di diferente modèl na Wechi. Ta trata aki di un proyekto ku for di aña 1993 a inisiá i ku a konosé diferente reto.

Manera ta konosí, un di e prioridatnan di e Lider i Parlamentario di Partido Nashonal, sr. Humphrey Davelaar, na momento ku Minister Suzy Camelia-Römer sinta komo Minister na mei 2015, tabata pa konstruí mas tantu kas ku ta posibel ya ku tin mas ku 7300 persona riba lista di espera na Fundashon Kas Popular (FKP) i mas o menos 3500 na Servisio pa Atministrashon i Maneho di Tereno Públiko (Domeinbeheer). E nesesidat promedio ta di 350 kas pa aña i FKP den e último 5 añanan ta konstruyendo menos ku 80 kas pa aña pa trata na aliviá e lista di espera. Esaki ta nifiká ku tin un retraso struktural di bibienda pa pueblo.

Wechi ta bai bira un barrio modelo repartí den diferente fase di konstrukshon ku finalmente mester rendundá den 4000 kas total ku ta kumpli ku standartnan mundial riba e tereno di energia renobabel. Den e promé fase ta bai konstruí 700 kas riba terenonan ku tamaño promedio di 300 m². FKP a hasi un petishon i a risibí e pèrmit di konstrukshon kaba serka Minister Camelia-Römer pa kuminsá konstruí e 62 di e 700 kasnan di e promé fase na Wechi. A pèrkurá pa konservá, drecha i traha algun dam i roi tambe den e area pa asina hiba un mihó maneho di awa na momento ku áwaseru kai. Ademas, den e otro fasenan lo bai konstruí areanan di rekreo, komersial i tambe skol pa muchanan por eduká nan mes. Ya kaba ROP i OW a hasi e análisis i tin plannan pa den futuro serkano trese e ahustenan nesesario den e infrastruktura (kayanan) eksistente, pa evitá ku ta krea un stagnashon den tráfiko. Kemen no ta trata aki di un proyekto ku ta konstruí kas sin mas, pero mas bien un kreashon di un barrio moderno i ehemplar.

Un danki ta bai na FKP, Tim di maneho di VVRP, Domeinbeheer, Servisio pa Planifikashon Urbano (ROP) i Servisio pa Obra Públiko (OW) pa nan esfuersonan hasí pa logra e meta aki. Minister Camelia-Römer ke gradesí tur e organisashonnan ku interes pa p.e. naturalesa i monumento pa nan aporte tambe den e proseso aki pasó a tene kuenta debidamente ku konservashon di algun area di naturalesa i tambe konservashon historiko kultural di monumentonan manera “landhuis” Wechi, ku ta bai konosé un restourashon kompleto.

Pa mas informashon di tur e desaroyonan rondó di Minister Camelia-Römer su akshonnan por bishitá e pagina di facebook “Minister Suzy Camelia-Romer” i pa desaroyo di e proyektonan di infrastruktura, por bishitá www.oloshiii.com